



Katika Shule ya Kristo

Laiti ungalisikiliza amri zangu! Ndipo amani yako ingalikuwa kama mto wa maji, na haki yako kama mawimbi ya bahari.—Isaya 48:18.

Tunapaswa kuingia katika shule ya Kristo na kujifunza upole na unyenyekevu Wake. Wokovu ni mchakato wa kujifunza mambo ya mbinguni; yaani mambo ya kiroho. Mafunzo haya humaanisha kumjua Kristo. Humaanisha kuachana na mawazo, mazoea na vitendo ambavyo vimepatikana katika shule ya mfalme wa giza. Roho inapaswa kufunguliwa kutoka katika yale ambayo yalipingana na utii kwa Mungu.

Moyoni mwa Kristo kulikuwa na upatanifu kamili na Mungu, kulikuwa na amani kamili. Hakupotoshwa na kusifiwa wala kudharauliwa au kukatishwa tamaa. Kunenwa vema au kunenwa vibaya. Kutendwa vema au kutendwa vibaya. Katika mambo hayo yote, Yesu alikuwa na hali ile ile. Lakini wengi wa wafuasi Wake huwa na hali ya wasiwasi na msukosuko moyoni, kwa sababu huogopa kumtegemea Mungu. Huwayawaya kwani hawajitoi kamili kwa Mungu; maana wanaepuka matokeo ya kujisalimisha huko yanaweza kuhusisha nini. Walakini wasipojitoa kikamilifu kwa Mungu hawawezi kupata utulivu na amani kamili.

Ni kujipenda nafsi ndiko kunafanya moyo usiwe na amani. Wakati tunapozaliwa kutoka juu, tutakuwa na nia ile ile iliyokuwa kwa Yesu, moyo uliomwongoza kujinyenyekesha ili tuweze kuokolewa. Ndipo hatutatafuta vyeo vya juu. Tutatamani kuketi miguuni mwa Yesu, na kujifunza Kwake. Tutaelewa kwamba thamani ya kazi yetu haijumuishi kujionesha na kupiga makelele duniani, na kufanya kazi kwa bidii na kwa ari kwa nguvu zetu wenyewe. Thamani ya kazi yetu, ni kadiri ya uwepo wa Roho Mtakatifu ndani yetu. Kumtegemea Mungu huleta utakatifu katika nia, ili kwamba katika uvumilivu tuokoe roho zetu.

Nira huwekwa shingoni mwa dume la ng'ombe ili kurahisisha kazi ya kukokota mzigo. Ndivyo ilivyo na nira ya Kristo. Wakati mapenzi yetu yanapomezwa katika mapenzi ya Mungu, tutaona kuwa mzigo wa maisha huwa rahisi kubebeka. Mtu anayetembea katika njia ya Mungu na katika sheria zake, hutembea na Kristo, na katika upendo Wake, roho hupata pumziko. Wakati Musa alipoomba kwamba, nioneshe njia yako, ili nikujue wewe. Baba alimjibu, "Kuwako kwangu kutaenda pamoja nawe, na mimi nitakupa pumziko" (Kutoka 33:14). Na kupitia manabii, ujumbe ulitolewa, "Bwana asema hivi, Simameni katika njia kuu, mkaone, mkaulize habari za mapito ya zamani, I wapi njia iliyo njema? Mkaende katika njia hiyo, nanyi mtajipatia raha katika nafsi zenu. Lakini walisema, Hatutaki kwenda katika njia hiyo" (Yeremia 6:16). Na anasema, "Laiti ungalisikiliza amri zangu! Ndipo amani yako ingalikuwa kama mto wa maji, na haki yako kama mawimbi ya bahari" (Isaya 48:18) (Tumaini la Vizazi Vyote, sehemu ya 1, uk. 309–311).